



DEPUTACIÓN PROVINCIAL  
A CORUÑA

SERVIZO DE PATRIMONIO E CONTRATACIÓN



CONCELLO DE  
CABANA DE BERGANTIÑOS

Número 139 / 2025

**CONVENIO DE COLABORACIÓN ENTRE A EXCELENTÍSIMA DEPUTACIÓN PROVINCIAL DA CORUÑA E O CONCELLO DE CABANA DE BERGANTIÑOS PARA A ATENCIÓN INTEGRAL CON ATENCIÓN DE VISITANTES E ACTIVIDADES CULTURAIS COMPLEMENTARIAS DE POSTA EN VALOR DO DOLMEN DE DOMBATE E A CULTURA MEGALÍTICA (CABANA DE BERGANTIÑOS), ANUALIDADE 2026.**

Na Coruña, a 9 de decembro de 2025

Ante min, Miguel Iglesias Martínez, Secretario Xeral da Deputación Provincial da Coruña, como fedatario actuante

**REUNIDOS**

Dunha parte, Don Xosé Penas Corral, en representación da Deputación Provincial da Coruña e

Doutra parte, Don José Muíño Domínguez, en representación do Concello de Cabana de Bergantiños.

Os comparecentes interveñen en uso das potestades que, por razón dos seus cargos, estanolles atribuídas

**EXPOÑEN**

1.- A Deputación provincial da Coruña realizou numerosas actuacións encamiñadas á protección, conservación, rehabilitación, musealización e posta en valor do Dolmen de Dombate. En primeiro lugar adquiriu os terreos onde se sitúa o Dolmen e as leiras lindeiras. A continuación, posibilitou a realización das correspondentes campañas de escavación e realizou os estudos e actuacións necesarias para a súa axeitada conservación e en especial das súas pinturas, de extraordinaria valor arqueolóxica. Así mesmo construíu un edificio para a súa axeitada protección e outro para a musealización e recepción de visitantes, coa finalidade da súa revitalización dentro da teoría, activa e integral, do museo.

2.- O Concello de Cabana de Bergantiños leva colaborando desde o ano 2014 coa Deputación provincial da Coruña na xestión cultural e turística do Dolmen, cun modelo de xestión do patrimonio no que os edificios e as actividades complementarias interactúan co espectador para facelo un actor activo, sensibilizando ao mesmo tempo sobre as posibilidades da cultura megalítica como reclamo turístico.

3.- O Concello de Cabana de Bergantiños quere seguir intensificando o traballo en común coa Deputación na xestión cultural e turística do Dolmen de Dombate e na posta en valor deste conxunto megalítico.

4.- Coa finalidade de establecer as condicións de cooperación necesarias para a posta en valor deste conxunto megalítico, a Deputación Provincial da Coruña e o Concello de Cabana de Bergantiños acordan subscribir o presente convenio, segundo as seguintes

## **CLÁUSULAS**

### **PRIMEIRA: OBXECTO.**

O presente convenio ten por obxecto establecer as relacións de colaboración entre a Excm. Deputación Provincial da Coruña e o Concello de Cabana de Bergantiños CIF: P1501400D por medio do cal a Deputación Provincial da Coruña encomenda ao Concello de Cabana de Bergantiños, a xestión integral con atención de visitantes e actividades culturais complementarias de posta en valor do Dolmen de Dombate e a cultura megalítica no ano 2026.

### **SEGUNDA: OBRIGAS DO CONCELLO DE CABANA DE BERGANTIÑOS.**

1. Facilitar a visita ao recinto patrimonial prestando os servizos de guía-monitor.
2. Control do tránsito tanto no recinto como nos dous edificios priorizando sobre todo a protección do monumento
3. Visitas guiadas cada 30 minutos (complementadas co visionado dun documental no centro de recepción e a visita á exposición).
4. Coordinación co persoal de seguridade para formar grupos nas visitas guiadas.
5. Controlar a utilización de cámaras ou equipos audiovisuais sen flash.
6. Responder e aclarar as preguntas e dúbidas dos visitantes.
7. Facilitar información turística e cultural (ao comezo e fin de cada visita guiada).
8. Atender coa maior consideración e amabilidade aos visitantes.
9. **Elaborar unha estatística de visitas mensual** e de xeito obxectivo e valorable.
10. O Concello de Cabana de Bergantiños deberá manter en perfectas condicións de conservación, tanto o inmovible coma os bens incluídos no mesmo, non podendo realizar obras no inmovible ou alterar as instalacións do mesmo.
11. Dinamizar o centro arqueolóxico dentro das actividades do propio museo.
12. **Promover o uso normal da lingua galega, oralmente e por escrito, debendo ser o idioma utilizado o galego, tanto nas visitas guiadas como nos logotipos empregados.**

13. Fomentar o estudo e a investigación en colaboración coas agrupacións culturais da zona.
14. A elaboración e difusión de métodos didácticos e informativos especialmente relacionados coa cultura da zona.
15. Promover actividades culturais: conferencias, gastronomía da zona, protección do patrimonio etc en relación con colectivos culturais e educativos da zona.
16. Establecemento de relacións e contactos con outros centros e museos.
17. Respetar e coñecer os criterios de acceso e uso do centro de recepción e pavillón do Dolmen de Dombate.
18. O Concello de Cabana de Bergantiños fará constar en todas as actividades, programas, folletos e carteis, etc., o financiamento da Deputación Provincial da Coruña.

#### **ACTIVIDADES COMPLEMENTARIAS A REALIZAR:**

##### **1. CAMPAÑA DE VISITAS ESCOLARES E OBRADOIROS DE PREHISTORIA**

- Ofrecer os venres de xaneiro, febreiro, outubro, novembro, decembro para as visitas escolares. Ademais, os meses de marzo, abril e maio tamén haberá **obradoiros de prehistoria gratuítos** para escolares os **mércores e xoves**.
- Os obradoiros realízanse nun espazo adaptado que se creará na zona de audiovisuais do Centro Arqueolóxico. A visita guiada será en Dombate adaptada ás idades do alumnado, con visionado de documentais e lectura de textos literarios.
- Contacto con todos os centros de ensino da provincia e coa sección de Turismo Escolar da Deputación da Coruña.
- EMPRESAS OU ENTIDADES ENCARGADAS: GALIPAT S. L., Servizo de Atención ós Visitantes.

##### **2. XORNADAS, CHARLAS, PRESENTACIÓNS, VISITAS ESPECIAIS**

- Convidar a científic@s, arqueólog@s, escritor@as... para que acheguen a Dombate todo tipo de público e intereses aproveitando a zona de audiovisuais do centro.(A Luz da Ciencia en Dombate)
- EMPRESAS OU ENTIDADES ENCARGADAS: Profesores/as, investigadores/as e persoeiros da vida cultural e científica.

##### **3. CELEBRACIÓN DA PRIMAVERA EN DOMBATE**

- Actividades de música, teatro, xogos populares... para celebrar a chegada da primavera a Dombate e o inicio dun ciclo que rematará o 21 de xuño co solsticio de verán.
- EMPRESAS OU ENTIDADES ENCARGADAS: Servizo de Atención ós Visitantes, músicos, contacontos, animación sociocultural...

##### **4. VISITAS TEATRALIZADAS**

- Representación teatral adaptada ó xacemento e aos visitantes. Para que non coincida coas visitas dramatizadas do Castelo de Vimianzo e Torres do Allo lévanse a cabo en dúas sesións (11.30 e 13.00) nos sábados de xullo e agosto. Visitas especiais abertas a veciños e visitantes para que coñezan Dombate desde outro punto de vista.

- EMPRESAS OU ENTIDADES ENCARGADAS: Os Quinquilláns, Servizo de Atención ós Visitantes

## **5. VERÁN EN DOMBATE**

- Actividades de música, "Concertos con encanto", teatro, monicreques, contacontos, xogos populares... para celebrar a chegada do verán a Dombate.

- EMPRESAS OU ENTIDADES ENCARGADAS: Servizo de Atención ós Visitantes, músicos, contacontos, animación sociocultural...

## **6. RUTA E NOITE DAS ESTRELAS.**

- Actividade xa habitual no verán cabanés e de grande poder de convocatoria. Ruta circular con inicio e fin no aparcadoiro de Dombate e que sube ao monte de Borneiro para contemplar a "chuva" de Perseidas na noite de San Lourenzo.

- EMPRESAS OU ENTIDADES ENCARGADAS: Servizo de Atención ós Visitantes, físico Jorge Mira.

## **7. MASTER CLASS MUSICAL EN DOMBATE**

- Clase maxistral e concerto de música clásica ou tradicional que se leva a cabo na zona verde do Centro Arqueolóxico, cando o tempo o permite, ou no centro de recepción de visitantes se non é posible no exterior (2 sesións).

- EMPRESAS OU ENTIDADES ENCARGADAS: grupos e intérpretes galegos ou de fóra de Galicia.

## **8. OUTONO EN DOMBATE**

- Actividades de música, teatro, monicreques, contacontos, xogos populares, carreira popular Dolmen de Dombate, exposicións, para celebrar a chegada do outono a Dombate e roteiro máxico do Samaín.

- EMPRESAS OU ENTIDADES ENCARGADAS: Servizo de Atención ós Visitantes, músicos, contacontos, animación sociocultural...

## **9. CAMPAÑAS DE DIVULGACIÓN E PUBLICIDADE**

- Campaña de difusión na prensa escrita, radio, redes sociais... para que o maior número de xente posible estea informada das actividades de Dombate cun diálogo constante con todos os interesados.

- Tamén se seguirá colaborando cos xornais de maior tirada na provincia e máis lidos na contorna concertando publicacións en datas sinaladas.

- EMPRESAS OU ENTIDADES ENCARGADAS: La Voz de Galicia. Imprentas.

### **TERCEIRA: ATENCIÓN DO PERSOAL E HORARIO**

a) O Servizo de Atención a Visitantes e demais actividades deberán prestarse por profesional cualificado, ben con persoal propio do concello ou ben cos correspondentes contratos que realice ó amparo do establecido da Lei 9/2017, de 8 de novembro, de Contratos do Sector Público. En ningún caso o persoal que adscriba o concello ao obxecto do contrato baixo calquera modalidade laboral ou administrativa suporá creación de relación laboral algunha coa Excm. Deputación Provincial da Coruña.

b) O horario de atención ao público será como mínimo:

#### **1. TEMPADA BAIXA (1 xaneiro-28 febreiro)/(14 setembro-31 decembro):**

Centrar a atención a visitantes nas fins de semana e ofrecer os venres para que os centros educativos poidan participar das visitas guiadas. En tempada baixa, a xornada será de 6 horas tendo en conta o horario escolar e o cambio de horario no outono e inverno:

**De venres a domingo (10.30 h. a 14.00 h.// 16.00 h. a 18.30 h.)**

O 8 de decembro ofrecerase servizo de visitas guiadas.

#### **2. TEMPADA EXCURSIÓNS ESCOLARES DE PRIMAVERA (1 marzo-19 xuño):**

Debido á maior concentración de excursións escolares e á campaña de obradoiros de prehistoria na primavera, ampliamos os días de visitas semanais a martes, mércores, xoves e venres. As fins de semana (sábado e domingo) comeza o horario de verán ampliando as horas de visita guiada (7 horas/ día):

**De martes a venres: (10.00 h. a 14.00 h.)**

**Fins de semana: (11.00 h. a 14.00 h.//16.00 h. a 20.00 h.)**

**Nota:** : En Semana Santa (do 28 de marzo ao 5 de abril), haberá servizo de visitas todos os días: (11.00h. a 14.00h.//16.00h. a 20.00 h.), e tamén o 1 de maio.

#### **3. TEMPADA ALTA (1 de xullo-13 de setembro):**

**De luns a domingo (11.00 h. a 14.00 h.//16.00 h. a 20.00 h.)**

**Nota:** Debido á baixada de visitantes a partir do 13 de setembro decídese reducir o horario e comezar coa tempada baixa.

#### **VISITAS GUIADAS NOCTURNAS:**

- Aproveitando o edificio do pavillón de Dombate, con iluminación interior graduable para poder crear distintos ambientes e boa acústica para música de fondo, continúaase coas visitas nocturnas como actividade especial nas noites de verán.

- Para as visitas é preciso inscrición previa e teñen 1 hora de duración ( de 23.00 a 24.00 horas). Ofrécese unha visita cada 15 días cun aforamento limitado de 30 persoas.

**XULLO: días 3 e 24 // AGOSTO: días 14 e 28.**

Para os visitantes en xeral e excursións organizadas ponse a disposición do público un **teléfono de atención a visitantes de luns a venres** en horario de **09.00 a 14.00** horas: **981754020** e un teléfono móbil con acceso a Internet 672435736 en horario de visitas guiadas. Tamén se pode reservar cita por escrito no email: **cultura.concello@gmail.com**

#### **CUARTA.- OBRIGAS DA DEPUTACIÓN PROVINCIAL DA CORUÑA**

1. A Deputación Provincial da Coruña abonará ao concello de Cabana de Bergantiños, o importe correspondente ao 100% dos gastos non cubertos por ingresos da actividade, ata un máximo de **62.184,41 euros, durante a anualidade de 2026, do 1 de xaneiro de 2026 ao 31 de decembro de 2026** con cargo á aplicación **0112/3362/22609**, condicionado á existencia de crédito adecuado e suficiente no exercicio presupuestario correspondente.
2. No caso de que os gastos xustificandos non cubertos con ingresos da actividade, foran superiores, a aportación provincial non superará en ningún caso a cantidade indicada na cláusula CUARTA do convenio.
3. Aboarase de conformidade co disposto na cláusula QUINTA do texto do convenio.

#### **QUINTA.- FORMA DE PAGO**

A Deputación Provincial abonará ao Concello de Cabana de Bergantiños a achega correspondente da seguinte maneira con arranxo á seguinte desagregación:

1. Efectuaranse pagos trimestrais, polo importe correspondente ao 100% dos gastos non cubertos por ingresos da actividade correspondentes ao citado trimestre e correspondentes a períodos vencidos.
2. En consecuencia non se efectuará ningún pago por anticipado.
3. Requirirán a presentación de certificación de gastos e ingresos durante o devandito trimestre, expedida polo Sr. Secretario co Vº e pr. do Alcalde-Presidente do Concello de Cabana de Bergantiños.
4. Acompañarase ademais memoria onde se indicarán as actividades realizadas, persoal adscrito aos servizos e informe estatístico de visitantes.
5. Cada pago requirirá informes favorables dos Servizos de Patrimonio e Contratación e de Fiscalización.

6. Para a cobranza de cada unha das achegas provinciais, o Concello de Cabana de Bergantiños deberá presentar certificación de estar ao corrente das obrigacións tributarias e de seguridade social.

7. Así mesmo deberá estar ao corrente das súas obrigacións fiscais coa Deputación provincial da Coruña, situación de que se determinará de oficio a través do Servizo Provincial de Recadación.

8. O Concello deberá presentar certificación dos ingresos producidos por achegas de entidades públicas ou privadas, se os houbese.

9. O importe da achega da Deputación provincial da Coruña, en concorrencia con outros ingresos non poderá superar o importe total dos gastos realizados.

#### **SEXTA.- SUPERVISIÓN POLA DEPUTACIÓN**

Sen prexuízo das facultades de vixilancia e inspección que corresponden á Presidencia da Deputación Provincial, o Servizo de Patrimonio e Contratación por si ou a través doutros Servizos Técnicos da Deputación, poderá inspeccionar en calquera momento o estado do inmovible e bens adscritos, e o cumprimento dos fins do presente convenio.

As actividades que desenvolva o Concello no Edificio do Dolmen non poderán superar o aforamento de 25 persoas no interior do mesmo, de acordo coas recomendacións da Dirección Xeral de Patrimonio Cultural da Xunta da Galicia, e en todo caso, as actividades deberán ser compatibles coa finalidade e adecuado uso deste ben cultural, para o que se deberán adoptar todas as medidas necesarias para a súa total protección e perfecta conservación. Para estes efectos o Concello solicitará da Deputación, cunha antelación polo menos de 15 días, autorización para a realización de cada unha das actividades especificando as datas, horarios e acompañada dunha memoria xustificativa.

#### **SÉTIMA: UTILIZACIÓN POLA DEPUTACIÓN**

O inmovible seguirá sendo propiedade da Excm. Deputación provincial da Coruña e en consecuencia poderá realizar no mesmo as actividades que estime oportunas.

#### **OITAVA: VIXENCIA**

1. O prazo de vixencia do presente convenio esténdese **desde o 1 de xaneiro de 2026 ata o 31 de marzo de 2027.**

2. As actividades se realizarán, aos efectos de imputación dos gastos, **entre o 1 de xaneiro de 2026 e o 31 de decembro de 2026**, e terán que estar xustificadas 1 mes antes do vencemento do período de vixencia do convenio.

3. Esta vixencia queda subordinada á existencia de crédito adecuado e suficiente no correspondente exercicio orzamentario.

#### **NOVENA: NATUREZA XURÍDICA**

O presente convenio ten carácter administrativo quedando as partes suxeitas á xurisdición dos tribunais contencioso-administrativos para resolver os conflitos que puidesen xurdir na súa aplicación. En todo caso aplicarase de maneira supletoria a Lei 38/2003, Xeral de Subvencións.

#### **DÉCIMA: CAUSAS DE RESOLUCIÓN**

Serán causas de resolución do presente convenio:

1. O incumprimento das cláusulas do convenio.
2. A aplicación dos fondos percibidos a fins distintos aos que deron lugar á súa concesión.
3. A falta de xustificación das cantidades na forma establecida no convenio.

Faise constar que o presente convenio foi aprobado por **Resolución de Presidencia número 55874** de data 24 de novembro de 2025.

E en proba de conformidade, ambas as partes asinan o presente convenio por duplicado exemplar no lugar e data indicados no encabezamento.

O REPRESENTANTE DA  
DEPUTACIÓN PROVINCIAL DA CORUÑA

O REPRESENTANTE DO  
CONCELLO DE CABANA DE BERGANTIÑOS

Asdo.: Xosé Pénas Corral

Asdo.: José Muíña Domínguez

O SECRETARIO XERAL DA  
DEPUTACIÓN PROVINCIAL DA CORUÑA

Asdo.: Miguel Iglesias Martínez